

REZ BILTEN

Regionalna razvojna agencija za regiju Centralna BiH



U ovom broju:

- REZ AKTIVNOSTI POVODOM OTVORENIH POZIVA EUROPSKE KOMISIJE
- UPRAVLJANJE PROJEKTNIM CIKLUSOM PO METODOLOGIJI EUROPSKE UNIJE
- SARADNJA NOVOG PROJEKTA EURELSMED SA REGIONALNIM RAZVOJNIM AGENCIJAMA U BIH
- KONFERENCIJA GRADONAČELNIKA I CIVILNOG DRUŠTVA
- OBUKA KONSULTANATA ZA IZVOZ
- EVD IZ HOLANDIJE U POSJETI REZ AGENCIJI I FIRMAMA
- KONFERENCIJA O PODUZETNIŠTVU I INOVACIJAMA
- JAČANJE KAPACITETA ZA PROGRAMIRANJE RURALNOG RAZVOJA BIH
- NAGRADA UDRUZI POSLODAVACA I PODUZETNIKA ŽEPČE
- REZ U ZAJEDNICI
- NAKON ZAVRŠENE CISCO AKADEMIJE
- DRUGI O REZ AGENCIJI

REZ AKTIVNOSTI POVODOM OTVORENIH POZIVA EVROPSKE KOMISIJE

Kako je i najavljeno u prošlom izdanju Biltena, nakon dužeg zatišja, ove jeseni otvoreno je nekoliko različitih javnih poziva što je REZ Agencija iskoristila da pripremi, bilo samostalno ili u partnerstvu sa drugim domaćim i /ili stranim partnerima, više prijedloga, koji će, nadamo se, na proljeće 2010. polučiti rezultate..

Sredinom oktobra, u okviru podrške EU ekonomskom razvoju BiH, objavljen je VI poziv Evropske komisije za dostavljanje prijedloga projekata. REZ Agencija na ovom pozivu učestvovala je sa dva projekta: EDIT, gdje je nastupila kao vodeći partner i MENTOR gdje je REZ partner u pripremi i realizaciji projekta zeničkoj razvojnoj agenciji ZEDA.

EDIT (**E**dukacioni institut **T**ravnik) je projekat koji je radjen zajedno sa travničkom Cebedom, a ima za cilj

da poboljša poslovno okruženje i ubrza privredni razvoj u regiji Centralna BiH kroz unapređenje i jačanje ljudskih potencijala, omogućavajući obrazovanje prema potrebama poslodavaca. Kroz projekt MENTOR (Moderna privreda kroz nove tehnologije i usmjereno istraživanje) radi se na stvaranju uslova za uvođenje modernih proizvodnih tehnologija, odnosno otvaranju puteva za privredu baziranoj na znanju. Ovaj projekat podrazumijeva razvoj i jačanje Tehnološkog parka u Zenici. U sklopu ovog poziva, REZ Agencija je pružila asistenciju Općini Zavidovići, te općini Tešanj.

Na javni poziv za IPA Jadranski program prekogranične saradnje, REZ Agencija se uključila kao jedan od partnera u projektu Jadranski ekonomski klaster klub (Adriatic Economic Cluster Club). Vodeći partner je Privredna komora regije Veneto, a u projektu učestvuju i partneri iz Hrvatske, Albanije, Srbije i Grčke. Projektom se predviđa uvezivanje proizvođača opreme za jahte, a takvo partnerstvo upravo odgovara preduzećima iz Tešnja, koja se već bave proizvodnjom različitih poizvoda od inoxa, nezamjenjivim materijalom u proizvodnji luksuznih brodova.

Budući da je ovaj poziv bio dostupan i za preduzeća, što je rijedak slučaj kada su u pitanju evropski fondovi za BiH, asistencija u pripremi prijedloga projekta, pružena je nekolicini privrednih subjekata iz Regije.

Informaciju o pozivu za dostavljanje projekata koji se odnose na oblast- Okoliš i prirodni resursi, a koji se uslijedio odmah nakon VI poziva, REZ Agencija je prosljedila svim Općinskim razvojnim timovima u regiji Centralna BiH, a sama se prijavila sa dva koncepta projekta. Okolišobrazovanje (Envirocation) i Održivo upravljanje Parkom prirode Tajan.

Krajem novembra 2009. otvoren je i 2. poziv za dostavljanje prijedloga projekata za područje Jugo-istočne Evrope (South East Europe). Poziv je dvostepeni, te se u prvom koraku tražilo iskazivanje interesa za dostavu projekta, koji znači definisanje koncepta projekta i partnerske grupe koje bi takav projekat implementirale. Drugi korak, za one koji prodju prvu stepenicu, podrazumijeva detaljnu razradu projekta. Poziv je odredio četiri osnovne oblasti rada: a) olakšavanje puta inovacijama i poduzetništvu; b) zaštita i unapredjenje okoliša; c) poboljšavanje dostupnosti d) razvoj transnacionalnih sinergija za održiv razvoj područja.

REZ je u partnerstvu sa organizacijama iz Slovenija, Italija, Grčka, Mađarska i Rumunija. kao vodećim partnerima, te kolegama iz Srbije, Hrvatske, Makedonije i Albanije aplicirao na više projekata. Ukupna vrijednost projekata na koju mogu računati partneri iz Bosne i Hercegovine je 866.282,00 EUR, a maksimalan iznos za jedan projekat u BiH je 300.000 EUR. Za implmentaciju je neophodno obezbijediti kofinansiranje u iznosu od 15%.

Nadamo se da će REZ sa svojim partnerima u 2010. godini imati priliku da implementira bar neke od projekata na koje je aplicirao u 2009.



Prezentacija za preduzeća u Ze-Do kantonu



Prezentacija za preduzeća u Srednjobosanskom kantonu

Izgradnja kapaciteta lokalnih nosilaca ekonomskog razvoja regije Centralna BiH

UPRAVLJANJE PROJEKTNIM CIKLUSOM PO METODOLOGIJI EVROPSKE UNIJE

Seminari za općinske razvojne timove

Evropska unija je nedavno objavila dva poziva za podnošenje prijedloga projekata: Podrška Evropske unije ekonomskom razvoju BiH (6. poziv) i IPA Jadranski program prekogranične saradnje (1. poziv). Veliki broj zainteresiranih potencijalnih aplikanata (općine, ministarstva, kantoni, nevladine organizacije, mala i srednja preduzeća i dr.) prisutnih na prezentacijama koje je organizirala REZ Agencija i Otvorenim danima upriličenim od strane Evropske komisije u BiH i Direkcije za evropske integracije još

jednom su ukazali na potrebu jačanja lokalnih nosilaca ekonomskog razvoja u regiji Centralna BiH, kako bi se što bolje pripremili za raspoložive fondove Evropske unije.

To je razlog zašto je REZ Agencija, po treći put u zadnje dvije godine, organizirala seminare na temu Upravljanje projektnim ciklusom po metodologiji Evropske unije, tokom kojih su detaljno obrađene teme: faze upravljanja projektnim ciklusom, analiza problema i ciljeva, logički okvir, indikatori, pisanje prijedloga projekta i izrada budžeta.

Seminari su održani u dva termina: 12. i 13. oktobra, te 23. i 24. novembra 2009. godine i bili su namijenjeni članovima općinskih razvojnih timova iz svih 16 općina naše regije koji nisu prošli ovu obuku u dva prethodna ciklusa. Bilo je ukupno 40 učesnika: predstavnika ministarstava i općina, lokalnih razvojnih agencija i nevladinih organizacija. Ovakvi događaji su prilika i da se članovi općinskih razvojnih timova međusobno upoznaju i uspostave saradnju, kako bi u budućim projektima mogli da nastupe kao partneri i implementiraju projekte koji će izlaziti iz općinskih okvira i poprimiti regionalni karakter. Vjerujemo da će znanja stečena na seminaru uskoro imati priliku primijeniti u praksi i pripremiti kvalitetne projekte, te aplicirati na buduće pozive Evropske komisije i na taj način doprinijeti ekonomskom razvoju svojih lokalnih zajednica i cijele regije.



SARADNJA NOVOG PROJEKTA EURELSMED SA REGIONALNIM RAZVOJNIM AGENCIJAMA U BIH

Regionalne razvojne agencije (RRA) u BiH: ARDA za Sjeverozapadnu ekonomsku regiju, NERDA za Sjeveroistočnu ekonomsku regiju, REZ za Centralnu, SERDA za Sarajevsku makro regiju i REDAH za Hercegovinu, su formirale Mrežu RRA već prije pet godina. Mreža održava svoje redovne sastanke svaka dva mjeseca. Regionalna razvojna agencija REZ je bila domaćin sastanka Mreže RRA, održanog 22. decembra 2009. Sastanku su, osim direktora svih pet regionalnih razvojnih agencija, prisustvovali i predstavnici nedavno započetog Projekta Evropske unije za regionalni razvoj i podršku malom i srednjem poduzetništvu u BiH (EURELSMED). Projekt će trajati tri godine, a biće usmjeren na jačanje kapaciteta općina u smislu povećanja njihovih sposobnosti za apsorpciju fondova Evropske Unije. Kroz implementaciju drugog dijela Projekta, nastojće se kreirati Vaučer šema, koja bi bila dostupna predstavnicima malog i srednjeg poduzetništva, uz pomoć koje bi privrednici imali olakšan pristup poslovnim konsultantima i ekspertima. Budući da se implementacija Projekta EU-

RELSMED vodi u saradnji sa regionalnim agencijama, tome je i bio posvećen ovaj sastanak Mreže RRA.



KONFERENCIJA GRADONAČELNIKA I CIVILNOG DRUŠTVA

Peta dvodnevna Konferencija gradonačelnika i civilnog društva, koja je okupila preko stotinu učesnika iz cijele Bosne i Hercegovine, održana je krajem oktobra u Zenici. Domaćin ovog skupa čiji je organizator bio Međunarodni centar za mir, a pokrovitelji gosp. Željko Komšić, predsjedavajući Predsjedništva BiH i Kongres lokalnih i regionalnih vlasti Vijeća Evrope, bio je načelnik Općine Zenica i aktuelni predsjednik Saveza općina i gradova Federacije BiH, gospodin Husejin Smajlović. Uloga lokalnih zajednica i civilnog društva u različitim aspektima razvoja BiH i njene eurointegracije, bila je okosnica svih tema koje su se raspravljale na Konferenciji. Radilo se u tri plenarne sjednice i nekoliko radnih grupa koje su obrađivale značajne probleme lokalnih zajednica i BH društva u cjelini. Nazivi samih radnih grupa u kojima su uvodničari bili eminentni stručnjaci za tu oblast, najbolje govore o temama koje su obrađivane: Ekonomski razvoj BiH, Evropske integracije i regionalna i transgranična saradnja, Lokalne zajednice i ustavne promjene u BiH, Uloga lokalnih zajednica u popisu stanovništva, Savremeni menadžment i brendiranje općina i gradova, Uloga populacijskog fonda UNPFA u BiH. U diskusijama, raspravama i oblikovanju prijedloga i preporuka su učestvovali načelnici općina, predstavnici razvojnih agencija, te različitih institucija. U preporukama je istaknuta potreba bržeg donošenja zakona koji će omogućiti jednostavnije evroatlanske integracije BiH, a to se posebno odnosi na zakon o javno-privatnom partnerstvu. Preporučena je što efikasnija priprema lokalnih organa vlasti za kandidiranje za pristupne IPA fondove, te da se puna pažnja posveti aktivnostima vezanim za strategiju ekonomskog razvoja BiH. Istaknuta je važnost učešća predstavnika lokalnih vlasti i civilnog društva u raspravama o ustavnim promjena-



ma, te da je važno obezbijediti da se ustavne promjene izvrše u skladu sa evropskim i svjetskim konvencijama o ljudskim pravima. Kako je istakao gospodin Smajlović, iako su predstavnici lokalnih općinskih uprava iznosili očekivanja od države, neophodna je njihova saradnja sa civilnim sektorom, jer se stremi ka zajedničkom cilju pa nema razloga za rivalitet. Predstavnici lokalnih zajednica i civilnog društva su ravnopravni partneri, a iskustva zemalja iz okruženja, koja su već postala dio EU, govore da je proces integracije uspješniji ukoliko je njihova saradnja uspješnija.

Među akterima koji su uspješno prezentirali različite teme na ovoj Konferenciji bili su i predstavnici civilnog društva kao što IPC, CCI, USAID, Sida, GTZ koji su govorili o svojim iskustvima u radu u BiH. REZ Agencija je pozvana da uzme aktivno učešće u radu Konferencije, te je tako direktorica, Amela Malićbegović, izvršila prezenatciju pod naslovom "Općinski razvojni tim – instrument lokalnog ekonomskog razvoja".

Organizatorima i učesnicima Konferencije uspješan rad poželjeli su pismima podrške, koje su između ostalih poslali i: Valentin Inzko, visoki predstavnik i specijalni predstavnik EU u BiH, Nikola Špirić, predsjedavajući Vijeća ministara BiH, Akiba Tadatoshi, gradonačelnik Hirošime, Ulrich Bohner, generalni sekretar Kongresa lokalnih i regionalnih vlasti i mnogi drugi.



OBUKA KONSULTANATA ZA IZVOZ

Izvozno orijentisana preduzeća u našoj regiji iskazuju konstantnu potrebu za kvalitetnim i provjerenim informacijama o ino tržištu i kao i mogućnostima asistencije pri izvozu. Zbog toga je REZ agencija zajedno sa holandskom, vladinom agencijom CBI, razvila program obuke konsultanata za izvoz kao podrške izvozno orijentisanim preduzećima. Njihova obuka će se realizovati u okviru dvogodišnjeg programa SET (Podrške izvozu i trgovini) koji finansira Ambasada Kraljevine Holandije u BiH. Glavni cilj ovog programa je unapređenje atraktivnosti i konkurentnosti regionalnog poslovnog okruženja u pogledu investicija i povećanja konkurentnosti privatnog sektora za izvoz i trgovinu.

Obuka ima za cilj stvaranje novog pula konsultanata za izvoz, koji će nakon završene obuke steći široka znanja iz ove oblasti te biti u mogućnosti da pomognu preduzećima iz regije da uspostave kontakte sa poslovnim partnerima u inostranstvu, predstavljaju svoje proizvode i prošire svoja tržišta.

Trening će biti organiziran za dvije kategorije eksperata: opšti i sektorski izvozni ekspert. Obzirom na potencijale naše regije, kao i potražnju na ino tržištima, kada govorimo o sektorskim ekspertima, tu se prije svega misli na sektor metala. U toku treninga, pored teoretskog dijela, konsultanti će raditi sa stvarnim firmama i početi uspostavljati veze sa potencijalnim partnerima van BiH.

Početkom decembra u prostorijama REZ Agencije održan prvi radni sastanak, kojim je započela intenzivna šestomjesečna obuka, a pored 19 odabranih kandidata i holandskih eksperata koji će voditi obuku, sastanku su prisustvovali direktor CBI programa za BiH g.Reinoud Nuijten, direktorica za razvoj u Ambasadi Kraljevine



Holandije u BiH, gđa Riny Bus, te gđa Leila Fetahagić, programski menadžer u Holandskoj ambasadi. Na taj način obilježen je početak, nadamo se, još jedne uspješne aktivnosti koji REZ Agencija ostvaruje zajedno sa holandskom agencijom CBI.

EVD IZ HOLANDIJE U POSJETI REZ AGENCIJI I FIRMAMA

Holandska Agencija za međunarodno poslovanje i saradnju (EVD), koja djeluje u okviru Ministarstva za ekonomske poslove Kraljevine Holandije, već pet godina uspješno saraduje sa REZ Agencijom. Svoj osnovni zadatak da promoviše i ohrabri međunarodnu poslovnu saradnju i trgovinu, EVD ostvaruje kroz širenje informacija o inostranim tržištima savjetujući domaće i strane klijente o mogućnostima koje se otvaraju, te razvijajući veze između potencijalnih partnera iz Holandije i partnera u zemaljama u kojima je EVD prisutan. Dosad je više od 50 firmi iz naše regije imalo prilike da aplicira na neki od programa EVD-a.

Početkom decembra 2009. godine je delegacija EVD-a i Ambasade Kraljevine Holandije u Sarajevu posjetila neke od firmi koje su koristile EVD-ove programe. Tako su, zajedno sa predstavnicima REZ Agencije, posjetili "NT Forging" i "BNT Hidrauliku" iz Novog Travnika, a u Vitezu firme "Economic" i "Bogner-Čelik". U Tešnju su EVD predstavnici posjetili "Inox Ajanović" i "BME".

Svi članovi holandske delegacije izrazili su svoje pozitivno mišljenje o firmama koje su imali priliku posjetiti.



Zadovoljni su bili dobrom organizacijom unutar firmi, njihovom infrastrukturom, proizvodnim asortimanom, uposlenim osobljem i, naravno, menadžmentom ovih firmi. Naročito je istaknuta spremnost na saradnju u zajedničkim projektima sa potencijalnim ino partnerima.

KONFERENCIJA O PODUZETNIŠTVU I INOVACIJAMA

Predstavnici vladinih institucija i agencija za unapređenje poduzetništva, te privatnog sektora, nevladinih organizacija i drugih relevantnih institucija iz



BiH, Srbije, Makedonije, Crne Gore i Slovenije okupili su se u Zenici na dvodnevnoj konferenciji «Business Development Conference 2009: Poduzetništvo i Inovacije» koju organizuju holandska agencija SPARK i zenički Business Start-up Centar (BSC), u saradnji sa Univerzitetom u Zenici i Centrom za inovativnost i poduzetništvo. Konferenciju je otvorio ambasador Kraljevine Holandije u BiH, Sweder van Voorst tot Voorst. REZ Agencija je uzela aktivno učešće na konferenciji. Naime savjetnik Agencije, gosp. Aladin Ormanović, pripremio je i prezentirao temu pod naslovom Proces zapošljavanja, bankrot i izvršenje ugovora. Sa ekonomskog i naučno-tehnološkog aspekta Konferencije, na kojoj je prisustvovalo više od 130 učesnika, rezmotreni su ključni razvojni problemi sektora malih i srednjih preduzeća sa ciljem da se ponude preporuke za njihovo otklanjanje. Tokom Konferencije istaknuta je i želja učesnika za uspostavljanjem regionalne saradnje i razmjenu najboljih praksi u ovoj oblasti među zemljama Balkana.

JAČANJE KAPACITETA ZA PROGRAMIRANJE RURALNOG RAZVOJA BIH

Kako bi se doprinijelo razvoju održivog, konkurentnog i dinamičnog sektora poljoprivrede, prehrane i šumarstva u našoj zemlji, Delegacija Evropske komisije u BiH započela je projekat "Jačanje kapaciteta za programiranje ruralnog razvoja u BiH - 3P- BHRD" koji je predstavljen 5. novembra 2009. u Sarajevu. Cilj tog projekta je pružanje savjetodavne pomoći kako bi se ojačalo programiranje poljoprivrednog i ruralnog razvoja, kao i platni kapaciteti u BiH radi budućeg pristupa naše zemlje značajnim sredstvima iz IPA programa, koja su specifično namijenjena ruralnom razvoju, a trenutno su dostupna zemljama koje imaju status EU kandidata. Prezentaciju je otvorio gosp. Johann Hesse, šef Odjela operacija za ekonomski razvoj, trgovinu i prirodne resurse pri Delegaciji Evropske komisije u BiH, a o samom projektu je govorio Jacek Wesierski, voditelj projekta 3P- BHRD. Ovaj projekat realizirat će Konzorcijum koji predvodi švedska organizacija NIRAS International Consultants u saradnji sa Fondacijom za programe pomoći poljoprivredi (FAPA).

Implementacija projekta počela je 1. decembra, a glavni korisnik projekta je Ministarstvo vanjske trgovine i ekonomskih odnosa BiH, te njegov Sektor za poljoprivredu, prehranu, šumarstvo i ruralni razvoj. U okviru državnog programiranja ruralnog razvoja, oba BiH entiteta i Brčko Distrikt će imati koristi u izgradnji vlastitih kapaciteta u skladu sa IPARD smjernicama i mehanizmima pomoći EU, te kroz stvaranja 'LEADER' akcionih grupa na lokalnom nivou. Zadane ciljeve projekta



trebalo bi postići kroz postepeno jačanje struktura vlasti, davanje podrške harmonizaciji i približavanju tog sektora EU, te putem promocije učesničkog pristupa u izradi i korištenju mjera ruralnog razvoja, koje će biti demonstrirane kroz primjenu "pilot aktivnosti". Mjere će biti kreirane na način da unaprijede ekonomski i društveni razvoj ruralnih zajednica u ciljnim zonama u BiH.

REZ Agencija je tokom prezentacije projekta uspostavila odnose sa njegovim voditeljima kako bi se što aktivnije uključila u ove aktivnosti na lokalnom nivou.

NAGRADA UDRUZI POSLODAVACA I PODUZETNIKA ŽEPČE

Udruga poduzetnika i poslodavaca Žepče još jednom je pokazala da se ozbiljan rad i inovativne ideje prepoznaju i van naše zemlje. U konkurenciji od 39 projekata iz 33 zemlje sa 4 kontinenta, 14. oktobra 2009. godine u Istanbulu, AGFUND je jednu od 3 pobjedničke nagrade dodijelio ovoj Udruzi za projekat „Uspostavljanje Agroinkubatora“ u Žepču. Nominirani projekti su ocjenjivani od strane svjetski priznatih stručnjaka i eminentnih ličnosti iz ove oblasti.

Za samo predstavljanje i implementaciju projekta zaslužna je g-đa Mira Jović sa svojim saradnicima, koja stoji ne samo iza ovog projekta, nego i mnogih drugih koje je ova Udruga implementirala u toku 10 godina svog postojanja.

O AGROINKUBATORU

Cilj uspostavljanja Agroinkubatora je, prije svega, jačanje infrastrukturne podrške poduzetnicima u agrobiznisu što će, naravno, doprinijeti razvoju općine Žepče i dijela regije Centralna BiH. Projekat je namjenjen postojećim i potencijalnim poduzetnicima u ruralnim područjima i poljoprivrednim proizvođačima, bilo da se pojavljuju kao samostalni ili rade u okviru nekog udruženja ili zadruge. Kroz Agroinkubator korisnicima

AGFUND

Program Arapskog Zaljeva za Razvojne Organizacije Ujedinjenih Naroda (AGFUND) je organizacija koja djeluje još od 1980. godine pomažući različite projekte koji za cilj imaju borbu protiv siromaštva, promociju obrazovanja, poboljšavanje zdravstvenog standarda i jačanje institucija koje se bave ovim aktivnostima. Ovu neprofitnu organizaciju osnovao je Princ Talal Bin Abdul Aziz Al Saud, a vodi je uz podršku lidera zemalja Arapskog Zaljeva. Od svog osnivanja ova organizacija finansirala je 1.242 projekta u 133 zemlje svijeta bez razlika na rasu, vjeroispovjest ili politička opredjeljenja.

će biti omogućeni različiti edukativni programi, učešće u izradi razvojnih projekata iz oblasti agrobiznisa, pristup finansijskim sredstvima, rad na uvođenju standardizacije itd. Umrežavanje i razvijanje partnerskih odnosa i poslovnih kontakata sa malim i srednjim preduzećima iz oblasti prerade, rezultiraće povećanjem poslovnih aktivnosti, održivosti i profitabilnosti, te biti potpora razvoju poljoprivrede i poduzetništva.

Projekat uspostave inkubatora finansirala je Delegacija Evropske komisije u BiH, a monitoring implementacije vršila je REZ Agencija.

Humanitarni projekti

REZ U ZAJEDNICI



OŠ "Čamil Sijarić" Kolići, Nemila



OŠ u Golešu, općina Travnik



OŠ u Vlahovićima, Turbe, općina Travnik

Saradnja REZ agencije sa Ambasadom Kraljevine Holandije, koja traje još od 2004. godine, rezultirala je značajnim projektima, ali ne samo onim koji su usmjereni na razvoj poduzetništva, nego i onim kroz koje se nastoji pomoći drugima koji nisu u svijetu biznisa, prvenstveno djeci u prigradskim i ruralnim područjima ili djeci sa posebnim potrebama. Tako, već treću godinu za redom kroz projekat «Vratimo život prigradskim naseljima» obnavljaju se škole, igraonice, organizuju druženja i putovanja.

Ove jeseni je grupa holandskih ratnih veterana okupljenih u Fondaciji "Veteranen Actief" iz grada Almera, u potpunosti rekonstruisala područnu osnovnu školu "Čamil Sijarić" u Kolićima kod Nemile. Pomoć u sanaciji škole pružili su im i prijatelji iz udruženja ratnih veterana Doboj Juga. Na skromnoj svečanosti povodom završet-

ka radova Holandanima su se zahvalili ministrica obrazovanja ZDK Zdenka Merdžan, zenički načelnik Husejin Smajlović i direktorica REZ Agencije Amela Malićbegović

U Srednjobosanskom kantonu ove jeseni obnovljene su dvije škole. Završeni su radovi na područnoj četvrogodišnjoj osnovnoj školi u Vlahovićima, Turbe, općina Travnik. Holandska organizacija „Institut Veteranen Eindhoven“ je obezbijedila finansijska sredstva, ali i svoj lični doprinos kroz angažman svojih volontera. Renovirana je i škola u Golešu, čije finansiranje je pomogla holandska organizacija KMA, a naravno radove su ponovo izveli holandski veterani.

Dotatno je krajem 2009. godine holandska fondacija Brabant odobrila sredstva u vrijednosti od 20.000 KM za nabavku školskog namještaja za škole u okolini Travnika.

NAKON ZAVRŠENE CISCO AKADEMIJE



Kao što je poznato REZ Agencija je još 2007. godine osnovala Cisco Akademiju mrežnih tehnologija u Zenici. Riječ je o osnovnom nastavnom programu dizajniranom tako da polaznike nauči osnovnim znanjima i vještinama potrebnim za kreiranje, izradu i održavanje manjih i srednje velikih računarskih mreža. Dvije godine kasnije, nakon četiri semestra i ukupno 280 sati teorijske i praktične nastave, 49 polaznika je uspješno završilo Akademiju i steklo pravo da polaže ispit za dobivanje Cisco CCNA certifikata, jednog od najtraženijih certifikata na svjetskom tržištu mrežnih tehnologija. Diplomantima Prve generacije zeničke Cisco Akademije 6.5.2009. uručene su diplome i certifikati. I dok se upisivala već V generacija polaznika, zainteresovali smo se kako su se, par mjeseci nakon dobijanja diplome, snašli oni koji su diplomu već dobili. Polaznik Prve generacije bio je gosp. Mersad Muhović (1984. godište). Redovno je pratio nastavu u kojoj je aktivno učestvovao, učio je kod kuće i završavao zadate vježbe. Ipak, rekao nam je da sve to i nije bilo tako teško. Samo se mora paziti da se mnogo ne izostaje, jer onda je gradivo teško stići. Sa diplomom u ruci krenuo je u traženje posla. I ubrzo se zaposlio u Sarajevu, u jednoj državnoj instituciji kao sistem administrator. Pri apliciranju za novo radno mjesto jedini je od svih kandidata imao završenu Cisco Akademiju što se u kombinaciji sa 4 godine radnog iskustva i ostalim diplomama iz oblasti informatike pokazalo kao dobitna kombinacija. Neka od pitanja na testu koji je bio eliminatoran za dobijanje posla, odgovorio je , kako nam sam gosp. Muhović



kaže, zahvaljujući znanju stečenom na Akademiji. Na žalost, institucija u kojoj je zaposlen još uvijek nije u potpunosti tehnički opremljena, pa je primjena stečenog znanja trenutno na toretskom nivou. Ipak znanje gosp. Muhovića će pomoći pri specifikiranju i nabavci nove opreme, čim se zato obezbijede odgovarajuća finansijska sredstva. Obzirom da mu je Cisco Akademija proširila vidike, Muhović planira nastaviti obrazovanje na polju informatike te obezbijediti još neki od certifikata koji će mu omogućiti što jednostavnije obavljanje svakodnevnih zadataka, ali i povećati njegovu konkurentnost na tržištu rada.

DRUGI O REZ AGENCIJI



Za REZ Agenciju i njene aktivnosti čulo se ne samo u našoj regiji, nego mnogo šire. U 5. broju Humanitarnog magazina Need koji se izdaje u Sjedinjenim američkim državama pod nazivom **Budućnost - Čvrsti temelji**, izašao je članak koji govori o nastojanjima da se područje Balkana okrene održivom razvoju. Moto časopisa: **Mi ne izlazimo da bi spašavali svijet, već da ispričamo priče o onima koji to čine** najbolje govori o samom časopisu koji podržava nastojanja mnogih razvojnih i humanitarnih organizacija širom svijeta da kroz različite projekte pomognu lokalnom stanovništvu odnosno njihovim zajednicama. Tako su, prije izvjesnog vremena novinar i fotograf ovog magazina posjetili REZ, čuli priču o tome kako smo nastali, šta radimo te su obišli neke od korisnika naših prošlih ili tekućih projekata i bili impresionirani našim nastojanjima da postavimo čvrste temelje za budućnost i sustignemo razvijeni svijet.

REGIONAL COLLABORATION

REZ Regional Development Agency was created to further regional economic growth when a CHF program transitioned into an independent organization. Bosnian businesspeople and mayors collaborated in its creation. The organization's primary aim is to advance the region's entrepreneurs, develop business networks and create public-private partnerships.



ALLEN KOVACEVIC (LEFT) IS AN ENTREPRENEUR AT THE REZ NETWORKING ACADEMY.

REZ operates a networking academy in collaboration with Cisco Systems. "The official unemployment rate in Bosnia and Herzegovina is around 44 percent," says REZ's director, Amela Malicbegovic. "We believe that learning IT skills will hugely benefit young people approaching the job market."



THIS REZ SUPPORTED FACTORY IN TRAVNIK, BOSNIA, RECYCLES GARMENTS INTO INSULATION.

REZ also assists businesses to exchange ideas, implement regional development projects and foster economic reform.



Regionalna razvojna agencija za regiju Centralna BiH

Štrosmajerova 11, 72000 Zenica, BiH
Tel: +387 32 462 161, Fax: +387 32 441 230,
E-mail: info@rez.ba, www.rez.ba